

Teresa Cacere ekintzaile soziala

“HERRIAK GUZTIAREN KONTROLA IZATEA LORTU BEHAR DUGU”

Askapenak Gasteizko Hala Bedi tabernan antolatutako “Erresistentzia eta herri boterearen eraikitzea hegoaldeko Europan” mahai ingurua probestu genuen, Teresa Cacere (Je So’ Pazzo kolektiboa) ekintzaile italiarra elkarrizketatzeko. Napoliko errealitate sozial gordinari nola egiten dioten aurre azaldu digu.



Xuban Zubiria Elexpe
@xubanzubiria

Napolik egin zaitu militante. Nola eta zerk eraginda hasi zenuen zure militantzia politikoa?

Nik txikitatik izan dut kontzientzia soziala. Ikasketek eraman naute Napolira. Hango testuinguru soziala oso emankorra da Italiako beste hiriekin alderatuta. Militantzia bizitzeko modu bat da niretzat, naturalki ateratzen zaidan zerbaite. Anomalia badirudi ere, Napolin dugun alkatea Luigi Dismitris (Mugimendu Laranja) oso gertu dago gizarte-eragileetatik eta horrek asko lagundu du zentro sozial askoren garapenean eta gazteen parte hartzea handitzen.

Je So’ Pazzo kolektiboaren parte zara. Zer eskaintzen dio zuen proiektuak Napoliko hiriarri?

Gure proiektua 2015ko martxoan hasi zen hiriarren erdialdeko eraikin bat okupatu ostean. Lan asko egin eta gero, hainbat dinamika martxan jartzea lortu dugu, tartean “herri ambulategia” deitzen dioguna. Italian osasungintza publikoa bada ere, ez da herriaren beharrik asebetetzeko gai eta arazo horri erantzuteko sortu genuen proiektu berriak hau. Hainbat medikuren kolaborazioari esker, astean behin kon-

tsultak, ekografiak egiteko aukera eta osasun laguntza eskaintzen ditugu gune okupatuan. Proiektuaren arrakasta ezin dugu ezkutatu eta Napoliko ospitale edo osasun zentroetara joan ezin dutenekin harreman zuzena sustatzea lortu dugu. Auzoetan dagoen bazterketa gutxitzen ari garela esan nezake.

Bigarren proiektu nagusiak Italian oso errotua dauden lan baldintza eskasaren tradizioa eta prekaritatea desagerraraztea du helburu. Horretarako Lanaren Herri Ganbera “*Camera Popolare del Lavoro*” jarri dugu martxan. Mugimendu horren funtsa langile guztien eskubideen defentsa egitea da, batez ere beltzean lan egin eta ia eskubiderik ez duten langileei babesa eskaintzea. Napolin lan duinaren aldeko defentsa sareak eratu nahi ditugu, langile guztien borroka oinarri hartuta.

Testuinguru horretan zein da *Camorra*-ren rola?

Camorra tragedia hutsa da Napolirentzat. Arazo kronikoa da eta zoritxarrez oraindik mafiaren sareak oso indartsuak dira Napolin. Guk mafiaren aurkako mugimendu bezala, uste dugu bere aurka egiteko daukagun armarik indartsuena hezkuntza dela eta auzoetako txikientzat aisialdi eskaintza opor bat garatzen saiatzen gara. Auzo pobreenetan kirola edo jolasen bitartez gazteen inklusio soziala indartzen dugu,

Camorra-tik ahalik eta urrutien bizi eta hezi daitezten.

Krisi latz honek Europa hegoaldeko herrialdeetan aktore politiko berriak (Poderamos, Syriza, CUP) sortu eta indartu ditu: Italian zein da egoera?

Je So’ Pazzo proiektuaren parte naizen aldetik, gure helburua beti izan da jakintza eta borroka sozial guztiak batu eta maila nazionalen federatzea. Alderdi politikoen gaitetik eragin nahi dugu. Herritarren arazoei, maila lokal eta nazionalen, erantzuna emateko egiturak sortzen dihardugu. Guzti honen adibide nagusia da Lanaren Herri Ganberarekin egin duguna. Erakundea Italiako beste hirietara zabaltzen ari da eta batzuetan oso indartsu ezarrira dago jada. Elkarlanean oinarritutako borrokek emaitza handiagoa ekartzen dutela pentsatzen dut. Italiar askoren moduan ni ez nau inongo alderdi politikok ordezkatzen, ez naiz horietako inon identifikatua sentitzen, baina hau ez da sekula arazo bat izan nire jardun militantea aurrera eramateko.

Matteo Renzi bultzatutako konstituzio erreformaren inguruan erabakia hartu beharko dute italiarrek hilabete barru. Ze irakurketa egiten duzu erreferendumaz? Erreferendumaren aurrean Italiako milaka erakunde sozialek agertu duten iritzia berbera dut. Renzi eta PD alderdiak

erreforma hau bultzatu dute, gaurdanik Italian oso murrizak diren erabaki guneak oraindik gehiago murriztu eta boterea gutxi batzuen esku uzteko. Gure politika herria ahalduntzea eta apurka-apurka erabaki propioak hartzeko ahalmena edukitzea da Italiaren etorkizuna hobetu dadin. Uste dut gure proposamena eta Gobernuarena kontrako norantzan doazela.

Herritarrak ahaldundu esan duzu? Zein da formula?

Arlo honetan Italian ere ez dugu errezeta magikorik. Nire ustez lehen pausoa da gure jardun militantean herritarren ahalduntzeak behar duen lekuari garrantzia ematea. Ahalduntzea *“controllo popolare”* edo Herri Kontrola deitzen diogun filosofiaren barruan kokatzen dugu. Herri kontrolaz hitz egitean, herritarrak politizatzea ezinbestekoa dela esaten ari gara. Herritarrak populismo xenofobotik aldentzeaz ari gara eta Italia hegoaldeko ustelkeria jarduera endogamikoetatik herritarrak urruntzeaz ari gara. Finean, herriak guztiaren kontrola izatea lortu behar dugu.

Bide horretan iniziatiba asko jarri ditugu martxan, kultur ikuskizunak, mobilizazioak eta baita Italia hegoaldean oso agerikoak diren boto erosketen aurkako kanpainak ere.

Europako leku askotara olatu xenofobo berri bat heldu da. Zein da egoera Napoli eta Italia hegoaldean?

Ultraeskuineko mugimendu populisten aurkako borroka ez da oraingoa Napolin. Oso hiri anitza izan da bere sorreratik eta milaka kultura elkarrekin bizi izan dira. Arrazakeria eta xenofobiari aurre egiteko beti egon da herri giha-



rra Napolin. Gaur egun ere era askotako mugimendu sozialen eguneroko lanak hor dirau eta desberdinaren aurkako mezua zentralitate politikitik urruntzen jarraitzen dugu. Errefuxiatuen krisiak ekarri duen krisi humanitarioaren inguruan kontzientzia sortzeko proiektu asko jarri ditugu martxan. ■

Goian, Teresa Cacere, ezkerrean Curro Moreno (SAT) eta Bruno Carvalho ekintzaile portugaldarrarekin batera. Askapenak eta Ipar Hegoa Fundazioak antolaturiko formakuntza jardunaldietan parte hartu zuten. Behean, 2015eko martxoan eratu zen Je So' Pazzo gune autogestionatua. Herri Anbulatorioa edo Langileen Herri Ganbera bezalako dinamika apurtzaileak sortu dituzte handik.

ARGIA 2017ko egutegia

Hormak edukiz janzteko.

© 943 371 545 · www.argia.eu/denda · denda@argia.eu

Egutegia

9€

Egurrezko taula egutegia opari

50€

